

Diabierna ultimo Mantbraca mester a entrega algun cos cla di Caya Grandi

Minister no tabata sa cu exactitud kico mester ta cla



ORANJESTAD – Despues cu a hala e fecha pa e trabou di Caya Grandi ta cla completamente, diabierna ultimo e compania di Mantbraca mester a entrega algun trabou cla di Caya Grandi. E trabounan cu mester a wordo entrega ta di klinker, luz y matanan, pero si esakinan no ta cla boet ta cay un biaha mas pa e compania.

Mantbraca mester a cuminsa paga boet, despues cu nan no a logra entrega e proyecto di Caya Grandi na ora. Segun Minister di Infraestructura Benny Sevinger na BON DIA ARUBA, e no tabata sa cu exactitud kico mester wordo entrega pa diabierna, pero tin un comision cu ta encarga cu tur esaki. E comision ta consisti di Dienst Openbare Werken (DOW), algun architect y “toezicht houders” di Infra Team. Tur siman e comision aki ta sinta cu e compania di Mantbraca, caminda cu nan

ta palabra cierto pasonan cu ta wordo tuma.

ENVOLVI DEN DECISION

E unico cos cu Minister ta envolvi den dje, ta momento cu tin decisionnan cu mester wordo tuma di indole cu lo por tarda e proyecto. Pa loke ta e tempo con pa yega na esaki, Minister ta laga esaki completamente den man di e comision, e ta bisa BON DIA ARUBA. Unico cos cu Minister ta pidi Mantbraca y comision, ta pa nan tene cuenta pa keda cla mas lihe cu e proyecto di Caya Grandi y na e calidad cu Gobierno ta exige.

COMISION TA DICIDI SI TA DUNA MAS TEMPO

Den tur proyecto tin contractiempo y esaki a pasa cu esun di Caya Grandi, pero momento cu esaki pasa ambos partido mester wak falta di ken esaki ta. Si ta falta di un contratista ta cobra boet, pero



si ta falta fuera di su alcance, e ta haya mas tempo pa termina cu e trabou. E comision ta esun cu ta dicidi si ta duna mas tempo, pero Minister ta para tras di nan.

FONTEIN TABATA PAFO DI CONTRACT

E fontein ta un stel post, y no ta un cay den e pakete general cu e contratista a haya. E fontein ta cay pafu di e contract di Mantbraca, pasobra den esaki a bin un post special pa e fonteinan, segun Minister. E ta sigui bisa BON DIA ARUBA, cu no necesariamente Mantbraca ta esun cu ta haya'e. Como cu nan ta e contratista encarga cu riba e infraestructura di Caya Grandi, Gobierno a dicidi di laga nan zorg pa esaki. Despues di a dicidi cu Mantbraca ta traha e fonteinan, e compania a

sinta hunto cu DOW y expertonan, pa yega na un conclusion con e fonteinan mester wordo traha.

Minister mester a cay aden pa trata cu e fontein na momento cu a pone den e presupuesto cu esaki lo costa mas o menos 800 mil florin, den e prome draft e fontein a costa dobel di locual a wordo poni cual tabata 1.6 miyon florin. Esaki a pone cu Minister a tuma e decision di haci cierto fontein chikito pa asina por a keda den e presupuesto. Esey ta pone cu e compania mester a traha cu loke tin den presu-

puesto, y nan mester a adapta e planan segun e prijs cu tin.

MANTBRACA A AVISA NA TEMPO DI TARDANSA PA FONTEIN

Segun Minister, Mantbraca a avisa na tempo cu e tin problema cu e entrega di e pisanan di fontein cu mester a wordo traha na Merca. Esey ta pone cu mester mira fout di ken esaki ta, sea si a tarda pa manda pidi esaki of e fabrica na Merca tabata tin hopi trabou di entrega. Esaki ta un situacion cu e comision mester a dicidi kico ta haci, segun Minister. □

